

求恕齋
叢書

段氏二妙年譜

孫益齋所著書

稷山段氏二妙年譜

序

晉絳土厚水深其民有先王遺教君子深思敦尙氣節
開否濟屯之交懷忠履貞之士自漢以下聞郭林宗之
風而起者隋唐之際則有河汾之學金元之際則有稷
山段氏之學處亂世抱遺經隱居著書絕塵不反其學
同其志同卽其桑海湛冥龍門辟地遺佚又未嘗不同
然王氏中說儒林傳習千有餘年而遜庵鞠軒兩集若
存若亡稷山師友皆不顯而龍門弟子若魏鄭公汾陰
薛獻公並起而爲興唐之佐命顯晦又似懸殊焉吾友
孫益菴廣文振奇績學潛擘乙丙兩部而尤洽孰金源

之掌故嘗得海豐吳仲怡侍郎石蓮庵所刊二妙集慨
吉光之僅存思遺文之放失倣魯豈杜集洪興祖韓集
之例輯年譜二卷正史無徵則旁攷河汾諸老集又博
采劉京叔元遺山虞道園諸家鉤稽歲月絲聯繩貫生
卒仕隱顚然明白論世知人尙友千載益葺之功蓋不
在杜淹阮逸下夫王氏著書自擬六經尊之者至以紹
洙泗之統或躋於荀揚之列而宋儒如洪容齋晁公武
迺言其依託福郊福時之夸飾傳信傳疑猶待後人之
攷定轉不如二妙一帙不絕如縷其爲北方之學者天
興之逸民易世未嘗有異議益葺此書發潛闡幽雖孤

證寥寥如陳爰書單辭明聽實足補完顏柱下之遺導
絳陽先河之路雖謂稷山之學賴益葺以存可也世有
桓譚願以余言質之宣統辛亥閏月長洲葉昌熾

序

譜牒之學昉自世本而兼綜一人行事者則東方朔傳李固別傳實爲之嚆矢也然其體率多類諸行狀未年經月緯以爲之者年經月緯之書大抵創始於兩宋薛執誼六一居士年譜洪興祖昌黎先生年譜皆著名於世其後魯訔杜甫年譜吳斗南陶潛年譜踵而遵之而譜牒一學遂與史家正傳並重矣金之立國百有餘年世所傳者僅拙軒淦水數集爲之譜者亦僅翁覃谿凌次仲遺山年譜一家識者不無遺憾焉吾友孫君益菴少爲甲部之學近更博綜九流派別兼究心金源氏

一代之掌固嘗客海上得無棣侍郎石蓮庵所刊稷山
段氏二妙集以爲譜牒者史之支與流裔也於是拾遺
補蓺銳意鉤稽未幾遂成年譜上下二卷余受而卒業
竊歎此書之成視遺山年譜蓋有數難焉何則遺山事
跡較詳又有金史本傳郝經諸人墓誌故行年無煩細
推二先生生卒歲月世德碑所載已隱略矣而本集又
無明文此權實之難一也遺山得名故國最早一時推
襟送抱多知名之士二先生肥遯空山朋酒唱和大半
無專集之可稽此旁證之難一也遺山著述等身今行
於世者尙有數種二先生遺文在段輔作跋時已云惜

多散佚矣此摭殘之難又一也益葺乃力爲其難一一
疏通而證明之存歿異同則據吳草廬集敘交游往還
則徵諸河汾中州等集又從山西通志各家專集中補
佚詩佚文若干首舉凡遯庵登第之年菊軒辭聘之歲
龍門避地晉寧遷居無不鉤深索隱使二先生一觴一
詠舟游巷嬉顯顯在目若親與游從而籍記其筆札者
然則此編之作豈特有功二妙卽謂中州百餘年文獻
之徵亦無不可也當君之著此書也余亦爲玉溪生年
譜補證而君書先成且曰以序屬子余因不敢辭爲疏
其綴述之大旨如此以告夫讀之者益葺他所撰述甚

富其補金史藝文略輯杜善夫遺集等書無隸侍郎尋
將爲次第刊行以問世云宣統庚戌夏五同學弟泉唐

張采田謹書

序

四皓隱商雒今洞庭閒乃有角里綺里東村遺蹟在焉
吾獨怪紫芝之歌未終而出定漢儲爲多事益菴先生
爲吾言亭林氏嘗謂後世逸民朝詠采薇夕喜奉檄迹
涉於僞蓋亦深病夫言不顧行先貞後黷者之不絕於
世也先生東吳文學少治南閣祭酒之書久之私淑會
稽章氏遂究心諸子家言能辨章徑術窮竟原委成諸
子通考暨通義要略諸作皆自闢奧窔足以啟牖來學
性耿介不樂仕進嘗刻顧景蕃志道集以見志又喜讀
陶公詩欲訂正其年譜未成成稷山段氏二妙年譜以

其皆逸民也理董伊始海寓清晏殺青未竟猝遭艱屯
承幹夙聞高義同志棲逸兒子就塾俾從奉手昔人謂
有宋南渡以後程學盛於南蘇學盛於北此特就黨趙
諸人言之耳完顏一代地褊祚短而亡國之後遯菴菊
軒聯袂高蹈與夫野史一亭殫心文獻空山掩淚笙磬
同音其志事視天地閒集谷音汐社諸君子何以異古
人不作來者難誣豈有享國遠過於金源聲教無閒於
南朔而箕子仁賢惟以陳疇爲心崔生高朗不聞一士
之報者哉先生於辛亥後又輯有金遺民錄藏於家殆
亦將如淵明之忘懷得失以此自終矣夫先生深於周

秦諸子之學吾誠無以窺其涯涘顧嘗念戰國時干戈
日尋仁義不競天下如一幾不知聖之爲聖跖之爲跖
莊周忘形骸齊萬物不顧千金之聘其憂世之心罕有
能識之者讀先生是書求之於意言之表可也乙卯秋
七月吳興劉承幹序

自序

二妙年譜者爲金源遺佚稷山段遯庵菊軒兩先生而作也兩先生世標清德夙播令聞褒魯連蹈海之貞守黃瓊枕山之介載蔚宗之筆足謚逸民記立晏之書何慙高士乃金元二史不立佳傳將十表待補曹昭三國私刪丁虞乎文采磨沒無由攷見君子憾焉當其幼時禮部閒閒趙公林宗善其風鑒許靖精爲月旦一見兩先生深用嗟異旣以二妙爲稱復有雙飛之目是則邱遲卯歲已蒙何點之知崔挺靈銓早識邢巒之秀矣厥後遯庵以進士貢菊軒於哀宗正大七年登收世科使

其鵬舉凌霄鳳鳴隆世際大定明昌之盛恢文通武達
之勛則長沙終有大名李訢本爲佳士迺天興改元邦
國殄瘁兩先生於是忘懷麟閣祕影龍門徒以葭艾幽
棲作墳簞之奏蕨薇高詠同笙磬之音韜伏以終豈不
悲哉然鎗迹元巖喁于爲樂頤光窮岫堙燠是甘求允
唯慕嘉遁夷叔遂彰清節斯固可謂古之隱君子也夫
長林豐草寶維外臣論世知人聿稱尙友余諷誦詩詞
每歎其締歡蓮社嗣響竹溪爛錦交披並吐池塘之句
聯珠競爽偏成林壑之游儻亦王徽所云濁酒忘愁書
籍相慰者乎獨恨商雒奇軌班掾猶存附錄河汾峻望

鄭公轉就要刪又其所與朋好者屏山信夫而外不過
襲之衡之子颺子京二姓昆季俱以棣萼之華只取薛
蘿之適並無當世通顯爲之揆張用是徵伯生世德之
碑攷京叔歸潛之志兼采橫汾諸書寫精露愚區年纔
月成年譜兩卷後之覽是編者庶知歐陽五代蓋闕韓
通昭明一生待傳彥博也夫金自永終而後慵夫莊靖
諸賢類皆耽翫琴書傲雅纓冕至如遺山元公抗希元
亮蒼涼故國之吟耆舊陳留鬱絕中州之作野史一亭
暉麗來祺近世爲年譜者始自烏程施氏而覃谿次仲
又復屬望清塵規王儉百族之牒皋牢軼事成史遷一

家之言兩先生之與遺山霞映觴辰齊譽於涇水霜茂
彫景冥契乎箕山則王質栗里之篇安禮柳州之錄此
亦媚古之士所宜急爲鳩緝者焉方今世習通脫運丁
亂離間兩先生之風其或懲薄激貪傳芳寫譽有興起
百世者乎余則望古遙集景行仰止焉舊矣己酉秋七
月元和孫德謙自序

金稷山段氏二妙年譜卷第一

求恕齋叢書

元和孫德謙編纂

吳興劉承幹參校

遯庵先生

金章宗承安元年丙辰

先生一歲

元吳澂二妙集序先生諱克己字復之人稱遯庵先生

元虞集河東段氏世德碑段氏世居絳之稷山又云金武威郡侯諱矩生三子長曰鈞次曰鏞